

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 98 (1985)

**Artikel:** Tieu barba Steivan

**Autor:** Klainguti, Göri

**DOI:** <https://doi.org/10.5169/seals-235013>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 18.07.2025

**ETH-Bibliothek Zürich, E-Periodica, <https://www.e-periodica.ch>**

# Tieu barba Steivan

da Göri Klainguti

Ma. Tü vessast gugent da savair dapü da tieu barba Steivan. E vainst tar me! Mo schi. Eau saregia propri l'unic in Europa chi so nouvas da que ch'el ho piglio per mauns eir aucha pü tard. Hest udieu cha vains stüdgio insembel . . . ch'el d'eira magister sest, che? Ed ün bun ch'el d'eira! Eau manag, tieu barba Steivan d'eira ün excellent magister . . . Tü hest eir imprais magister? Interessant . . . Mo schi, insomma, tuot chatta cha tieu barba Steivan saja sto ün cas tragic e per quelo tuot tascha. Il pü gugent vessane sch'el füss mort quella vouta, dal 45. Alura pudessane aucha hoz quinter quaunt flot e cher e bun ch'el d'eira. Pustüt ils confamiliars . . . scu il Chersegner at füss el gnieu preschanto e tü savessast üna pruna dad el. Ma que es ieu oter e dimena nu't quintane ünguotta. Per els tieu barba Steivan d'eira gnieu amalo da spiert e basta. Ma tü voust savair che chi d'eira sto!

Tieu barba Steivan d'eira magister da tuot las nouv classas, e genituors e scolars e'l cussagl da scoula nu'l savaivan luder avuonda. Alura, dal 45, l'utuon, güsta zieva las vacanzas da sted vaiva que cumanzo. Ils scolars d'eiran ieus a scoula e turnos tuot consternos. Els dschaivan cha lur magister sbatta. Ch'el be disegna roba vi da la tevla e fatscha ir plattas da grammonfon cha nu s'inclegia e nu dia pled. Cha pel solit ils lascha'l dafatta sulets in staunza.

Eau nu se che cha'l's scolars quintaivan aucha tuot da lur magister, fat es cha a forza da genituors, cussagl da scoula ed inspecter e tuot, l'haune tramiss tal psichiater, ed alura l'haune licenzcho.

Eir ad a me vaivane dumando, sch'eau m'hegia inachüert già pü bod da sia malatia. Eau stögl dir, auch'hoz chatti da na. Steivan gaiava forsa pü a fuonz a las dumandas cu oters, ma ch'el füss sto disturbo da spiert nu possi brichafat pretender. Anzi, el d'eira cler e consequent, politicamaing forsa ün pô fanatic, quelo es pussibel. E conscienzchus d'eira'l. Insè, bod qualchosa sench d'eira vi dad el. Eau m'algord cu ch'el ans

vaiva dit trid üna vouta perque cha vaivans zaclino ad üna schluonzra – forsa cha lo, quels lagns, d'eiran stos ün miel exageros . . . Scha stüdg . . . el d'eira üna spezcha missiunari. Quelo d'eira'l propi già düraunt il stüdi. El ho adüna vulieu musser la güsta via als oters.

Bain. Ma tü voust savair cu cha que es ieu inavaunt cun tieu barba Steivan. Eau vez già, tü t'impaisast cha quist veglioc cha sun cò, da bod ochaunt'ans, ch'ea saja senil e giaja pella rama e m'oda be gugent a discuorrer . . . ma eau d'he üna cumprouva, spetta bel! Eau d'he cò üna broschüra dal 1954. No da l'America. Tuot es fich inclegiantaivel, l'inglais es simpel. E guarda cò: L'autur es tieu barba Steivan! Eau d'he mussó tuot eir a tieus bap, ma quel nu voul savair nouvas. Vers te nu varo'l flippieu pled, in sa temma cha tü gjajast a glivrer scu sieu frer. Ma che!

Schi quista broschüra dimena – tü la poust ler – descriva il desaster cha l'umaun es vi dal metter ad ir sün nossa terra. Ed uossa rivainsa tar la «malatia» da tieu barba Steivan.

El s'ho dit – que es tuot explichó e bain formulo illa broschüra – el s'ho dit cha l'umaun mettaregia suotsur il muond cumplettamaing. Üna guerra atomica al pera inevitabla. El as figüra cha que possa der ün pér survivants da quista catastrofa immensa e chatta lo sia granda occasiun per funder üna nouva societed umauna. Tü cumainzast a vzair, che?

Eau m'impais cha già quel di ch'el ho udieu dals effets da la bomba atomica, cha già lo as varegia sieu intern bulverso cumplettamaing. Tuot las valuors da sia vita fin lo saron sblachidas per fer lö a l'unica granda ideja, quella da pudair funder üna nouva societed umauna. Ma tü voust savair cu, eau incleg, eau sun vegl e discuor da memma. Ma eau quint, eau quint.

Tieu barba Steivan as ho dit – quista broschüra stust ler, que sto tuot aint a cò – üngün nu po savair inua sulla terra cha quists survivants eventuels u perfin prubabels saregian da chatter, survivants da la guerra atomica. Neir che lingua cha discurriron, neir tiers che cultura cha tucharegian. Ad es eir da prevzair cha'l prüms tschientiners saregiane cumplettamaing absorbos culla spüra luotta per surviever. A vivaron in ün stedi fich primitiv e varon pers tuot il savair da l'umanited dad hoz. Ma ün di cha quels pér survivants as varegian ün miel remiss da las catastrofes – el discuorra da l'an 2500 – pudessan els dvanter «noss» scolars, eau manag ils scolars da tieu barba Steivan. Ma cu communicher cun els? Queco chattast tuot explichó illa broschüra! Sün mincha 1000 kilometers saja dad eriger üna tuor, tü chattast chartas geograficas chi indichan eir

tuot las islas chi vessan da survgnir üna da quistas tuors, insomma, el voul sterner sur tuot la terra sems chi cuntegnan sieus cussagls. Ed in che fuorma cha quels sun fixos! Lo rivainsa a la genialited da tieu barba – cha tuot vulaiva avair amalo da spiert!

El nu descriva cò tuot ils detagls, ma el quinta ün pô da las metodos ch'el ho preparo per attrer il buonder da quists survivaints. El ho stüdgio a fuonz la psicologia da l'umaun primitiv, dal pop aucha poch influenzu da la cultura etc., etc. A scoula, quel an cha til vaivan spedieu, varo'l vulieu experimenter che ch'ün umaun qualunque piglia a maun sch'el riva davaunt üna da quistas tuors . . . ma s'inclegia cha la scoula nu d'eira il lö adatto per da quists experimaints, pustüt na, già ch'el stu propi esser dvanto penetrant our da tuot las bottas. Ünguott'oter nu l'interessaiva pü cu be sia morela infallibla ch'el vulaiva surder a la nouva umanited. E l'interessant, in sieus cussagls – chi vessan dafatta cuntgnieu grammofons e projectuors da film – vulaiva'l explicher, daspera sia morela, eir tuot que cha l'umaun so e so fer hoz, el vulaiva dimena eir integrer ils plans per fer motors e dafatta per la bomba atomica . . . Dad ün moralist scu el as vess forsa spetto ch'el scumandess al «nouv umaun» da s'occupper da la scienza per ch'el mê nu vegna in tentaziun da's perfecziner illas tecnicas e repeter il svilup desastrus dad hoz. Ma Steivan na. Eau m'algord ch'el d'eira bod fanaticamaing da l'ideja cha'l mel in nossa societed deriva be da la fosa educaziun. Nos desaster d'eira per el ün problem morel e na tecnic. Eau craj cha Steivan d'eira – aunz sia malatia – uschè ün grandius magister, güsta pervi da quista persvasiun, üna persvasiun dal rest chi seguond me es cumplettamaing fosa, ma . . . fosas teorias cun adherents persvas haun suvenz gieu dapü effet sün nossa terra cu las güstas . . . piglia be la medicina . . .

Ma. Mieu cher. Tü voust savair che chi'd es dvanto our da tieu barba Steivan! Guarda cò: La broschüra es edida d'üna «Society of the New Religious Way of Life», m'impais cha que's tratta d'ün club da religiusins chi nu vaivan inclet a Steivan e chi l'haun alura beincumel exclus da lur societed cur ch'el vaiva elavuro sieu proget pü in detagi.

Fat es cha per sieus stüdis vaiva'l collavuro culs professers ils pü cuntschaints da l'America e vaiva dafatta pudieu der impuls als scienzzchos chi tscherchaivan communicaziun cun intelligenzas extraterrestras.

In dumandas scientificas stu'l esser sto fich cler, be apunta pels conumauns saro'l dvanto adüna pü insuportabel eir cuvi. Cha l'umaun in sia ingurdia e fos'educaziun bütta suotsur la terra, d'eira il prüm be sto sia

persvasiun. Ma cul ir dals ans, pü ch'el lavuraiva vi da sieu «sem per la nouva umanited» e pü cha sia persvasiun s'ho transmüdeda ad üna spraunza. Da generels as disch minchataunt per skerz cha lur pü grand inimih saja la pêsch – be cha quel skerz, pür memma, ho üna granda vardet. Scha tü at preparast ans a l'inlungia per qualchosa, schi stust cul temp bod sperer cha que aintra, scha tia vita dess avair gieu ün sen. Tuot sias forzas vaiva'l sacrificio, tieu barba Steivan, a l'ideja da pudair reformer l'umanited da fuonz sü, schi es que dad inclej cha'l muond, pü corrut e desastrus cha'l dvantaiva e pü ch'el correspundaiva a las spraunzas da Steivan.

Ma il proget d'eira uschè monstrus cha la realisaziun faiva aucha spetter, uschè cha tieu pover barba Steivan nu varo pü savieu che sperer. Vaiva'l da giavüscher: «Na aucha, umanited, spetta fin cha sun pront, spetta cun at der la ruina radikela» u: «Be dai! Ruinè vossas relaziuns, dvantè pacific aucha pü scelerats ed infams traunter pér, vus umauns, vussas famiglias, vussas naziuns?» Uschè cha tieu barba Steivan d'eira gratagio in üna situaziun schizofrena . . . Ah! Que nu't pera pü güsta logic cha'l prüm discurrivi d'ün cas furtüno e cha uossa croudi plaunet eir eau in quista schlerna da tuot tieus paraints e cha vögl metter tragedia in sieu destin . . . Eau se dapü da tieu barba Steivan cu tuot ils oters, tü hest radschun, schi che am laschi influenzer da lur idejas bigottas! Üna merda schizofren. Tieu barba Steivan es alura gnieu pü vegl eir el. E sieu spiert missiunar s'ho balcho ün pô. Grazcha a sia lavur exacta e fundeda ho'l gieu ün success straminabel cuvi. Cul temp ho'l fundo püssas societeds, ad es gnieu investieu, sias firmas haun cullavuro culla scienza astronautica, il predsch da las aczias augmentaiva da mais a mais. Tieu barba Steivan es gnieu ün hom rich e bainvis. L'es dvanto furtüno ed ho marido e tuot . . . Cha'l diavel, adüna cun lur gniffa torta da cumpaschiun per la vita tragica u amaleda e che se eau . . .

Eau vez cha tü nu'm crajast dret. Tü t'impaissast: Che! Da quist veglioc senil cò nu possi crajer ünguotta. Che cumprouvas ho'l? Quelo es vaira. Oter cu quista broschüra nu d'heja ünguotta. A schi, aucha sia charta ch'el vaiva scrit tiers la broschüra, quella poust eir ler. L'es dal 55, cò scriva'l dal rest ch'el hegia banduno la prüma societed; quella dals religiusins, per funder ün'egna. Il prüm loda'l nossa veglia amicizcha e disch cha ad oters in Europa nun hegia'l tramiss, ma cha da me hegia'l l'impressionsiun cha pudess m'interesser etc., ed alura m'invida'l da pajer üna contribuziun u dafatta da dvanter acziunari da sia societed. Eau d'eira chüz,

tü sest, quel temp zieva la guerra, ed eau nu vaiva do resposta... Avaunt var 10 ans d'hej alura pruwo da chatter sia adressa, ma que es sto impussibel. Cò in Svizra ho que gieu nom ch'el sajà sparieu u mort, cuvi: Müdo adressa e se eau che tuot.

Ma üna es sgür; mieu cher. Scha tü voust savair aucha dapü da tieu barba Steivan, schi do que üna clev! Scha tü voust propri imprender a cugnuoscher sieu caracter e sia grandezza, schi vo in tschercha dad üna da sias tuors, ün da sieus «sems per la nouva umanited». Eau sun cumplettamaing persvas cha quellas existan hoz e sun erettas pü u main in distanza da 1000 kilometers üna davent da l'otra. U melder vest sün qualche isla, lo chattaregiast üna eir scha'l territori es pü pitschen. Pussibel füss cha que nu's tratta da tuors – scu cha'l proget prevzaiva dal 54, eau m'impais cha la tecnica moderna permetta dad impitschnir la granda part enormaing... be la scoulazion fundamentela, ils elemaints, saron eir hoz aucha grands... forsa as tratta que da chaschas suot qualche culonna da betüm, insomma, vo e tschercha. Scha tü chattast qualchosa, schi fo'm a savair. Que m'interessess fich.

